

Union MoS Dubey-i Kohima nung CSS mapa inyakba reprangdang

Kohima, January 10, 2026 (TYO): Union Minister of State for Coal and Mines, Satish Chandra Dubey-i Honibarnü Kohima district nung Centrally Sponsored Schemes (CSS) inyakba meyipa reprangogo.

Dubey-i tanü anüngdang Kohima tonga aru aser iba sülen Rusoma yimtsüngi oa tang teinyakdak mapatem reprangdanga liasü.

Rusoma yimtsüng nung village council hall & circular road, health facilities, schools, Jal Jeevan Mission, health & wellness centre aser Orange Orchard mapatongtem teinyakdak lir.

Kohima Deputy Commissioner Conference Hall nung senden ka amen aser iba senden nung district heads of offices, ketdangsürtem, kin lennirtem aser civil society organizations nungi teshimtet nübotem aden.

Prime Minister Narendra Modi-i tenzüksüba schemes asadangtsü aser public senotsü timi amshitsü atema pai Nagaland semdangar ta MoS Dubey-i ashi.

"Prime Minister Modi-i North East ama tesemtem nung temulung agütsütsü mangdang lir. Tesüiba nung anepaluba mesüi

yutsüba tesemtem pai renlokdaktsünür aser northeast ajunga aintsü atema district aser state levels renloktsübaji kanga tongtipang" ta Dubey-isa metetdaksü.

District tem sema senzükba ya mapa inyakba nung tetsükdaktsü alibatemjangatsü nükjiong nung lir ta paisa ashi.

"Nagaland nung chemicals mamshii chiyungtsü tsünüba atema tenüngsang agütsür. Iba organic aser traditional farming practices ya national health advisories den kanga putepa lir aser medical tsütsü senotsü endokba ajemtsü" ta paisa ashi.

Centre sorkari 'Sabka Saath, Sabka Vikas' mangdang kübok tesem ajak renlokdaktsütsü tenangzükba lir. Linük nung tesem ka danga central welfare schemes magii melidaktsütsü ta MoS Dubey-isa ashi.

Paisa Deputy Commissioner B. Henok Buchem aser district team ajanga iba sentong kanga junga acha-ayanga agiba atema pelar ta paisa shisem.

Dubey-i Deobarnü Kohima War Cemetery, Kohima Ridge Eco Park, aser Kohima Smart City multi-level parking facility semdangar Delhi-i aotsü.

Dimapur Airport renloktsü atema ARTC belentsüla: BAN

Dimapur, January 10, 2026 (TYO): Assam Rifles Training Centre (ARTC)-i Dimapur Airport ali atsünga agia aliba azüngtettsü atema tetuyuba agüjang ta Business Association of Nagas (BAN)-i Ministry of Home Affairs (MHA) dangi shidi ka zülüogo.

Dimapur Airport ali acre 148 shi ka ARTC ajanga "indefinite temporary" kübok lir aser CRPF-i ano ali acre 14 agia lir ta BAN-i MHA dang ashi.

Tawa airport ali atsünga agirtem meindokba mapang ka nung BAN-i iba shidi zülüogo.

Iba mapa tajung ya civil society teyari agia inyak ajisüaka sorkar telok kati airport ali atsünga agiba ya tim masü ta parnokisa ashi.

State sorkari Chümoukedima kübok Shokhuvi nung ARTC belentsü asoshi teti atema ali agütsüogo saka belentsü mapang menuba ajanga airport renloka aitsüba nung ARTC training centre ajanga tetsükdaktsü tulu agütsür. Parnoki ali mazüngtettsüba agi runway extensions, terminal upgrades aser tanga infrastructure maparen meinyakteter ta BAN-

isa metetdaksü.

Nagaland nung gari lenmang majungba, rail ajanga tesentaktep junga maliba aser waterways maliba ajanga air connectivity nung metaloka lir. Dimapur Airport ya state nung primary commercial aser connectivity hub lir saka airport renloka moutetba ajanga rongsenketzüng tsütsü takoksa ajurur, ta BAN-isa ashi.

Anungji MHA-i iba ken o ya infrastructure tsütsü tebilemstü tuluka ta züngshitsüla aser mapang telatet ka yur ARTC belentsüla ta BAN-isa shidi nung shiogo.

LKM-i 'Smart' aluyimba aser 'Tourism' nung temulung agütsütsü

Dimapur, Jan 10 (TYO): Langpangkong Kaketshir Mungdang (LKM)-i tanü putu den apet technology aser Artificial Intelligence (AI) inyakyim amshia lanurtem aluyimba mapa tenzükdaktsütsü aser alima tesem balala nungi raliwalirtem aruba ajanga rongsenren ajangzüksü aser aser sobaliba otsütem wazüka ayutsü asoshi Langpangkong ajunga 'Toruist Circuit' küma inyaksü ta telemetba agiogo.

Iba telemetba ya Mongsenyimti nung yashi yakanü January 8 nungi 9 tashi

LKM 34 buba inti mungdang alidang loktii lemtetba pangzüngtem rongnung tongtubang ana liasü.

Iba LKM inti mungdang omen 'Mongjen Mesemshidi' ta asüba nung amendaker Rongsen nung nüjiso aser Technology aser AI ajanga tarutsü putu nung waishin meteta lia otettsüba onüktem nung shisatokden agiba sülen item inyaka aotsü pangzüngtem yanglua liasü. Iba ama putu dak apet aluyimba aser rongsen bushi tenzükba ajanga memenui asenoka tarutsü nungbo rongsen nung tangar dak nendaka melii nüji küma

peisasa litettsü nükjiong nung kaketshirtemi iba pangzüng ya renemogo ta LKM lenirtemisa ashi.

Iba ' Smart Farming' maparen nung Krishi Vigyan Kenra (Agriculture Science Center), Indian Council of Agricultural Research (ICAR), National Institute of Electronics & Information Technology (NIELIT) aser Nagaland Agri & Allied department-tem nungi shisalen teyari agia inyaka aotsü tangatetba aser teimla nung iba pangzüng ya renem ta LKM lenirtemi metetdaksü.

(Maneni tapak 2 nung...)

Congress-i MGNREGA Bachao Sangram tenzük

Dimapur, January 10, 2026 (TYO): Dimapur nung Congress-i tanü 'MGNREGA Bachao Sangram' tenzükogo aser state kübok tesem balala nung panchayat-level nung sentongtem agiba den lungkak aitba sentongtem agitsü.

"Parliament nung tawa Bill Viksit Bharat-Guarantee for Rozgar aser Ajeevika Mission (Gramin) Bill VB-GRAM-G Bill agizükba ajanga MGNREGA tangatetba tongtitem raksatsütsü. Iba ajanga rural employment nung lendong bentsür arutsü aser job guarantees sota ayutsü" ta Congress Bhavan nung Dimapur District Congress Committee president Kutoho Chishi-i osangbener dang ashi.

"Dimapur aser Nagaland nung dang masü saka linük ajungalen VB-GRAM-G Bill ajanga rural employment, income security, aser socio-economic stability nung tetsükdaktsü bentsür arutsü aliba osang metetdaksütsü atema iba campaign agir" ta pai ashi.

Iba campaign ajanga public nem angatetdaksütsü aser media dang MGNREGA wazüka ayutsü nenshitsu, ta Kutoho Chishi-isa ashi.

Dimapur nung alirtem, civil society organizations aser bangdak senso ajaki sentong balala nung shilem agitsü

ayongzüker ta paisa ashi.

Congress-i MGNREGA kümzüka ayutsü atema panchayat-level outreach, Martyrs' Day nung ward-level sit-ins aser January 31 nungi February 6 tashi district-level dharnas agitsü ta paisa shisem.

"India nung yimtsüng tia nung alir nisung million aika atema MGNREGA ya kanga tongtipang lir aser iba ajanga financial year ka nung kilen shia nem anogo 100 mapa inyakba taa agütsür. Iba ajanga yimtsüngtem nung alir mapa inyakertem tashi itdaktsüogo, sensaktia ajemdaktsüogo aser rural infrastructure tashi itdaktsüogo" ta Chishi-isa metetdaksü.

Sorkari VB-GRAM-G Bill ajanga tetsükdaktsü bentsür arutsü aliba reprangshimsüla aser rural workers taginübatem kümzüka ayutsü atema sendaktepa alirtem den olemteptsüla ta paisa mepishia metetdaksü.

MGNREGA ajanga yimtsüng nung mapa inyaker shiai mapa inyaksü temeten agütsür aser ibaji magientsü atema Congress-i noktaker. MGNREGA akangakanga benshiba ajanga Dimapur aser linük ajungalen yimtsüng tia nung alirtem ajangzüksü aser renloktsü ta Kutoho Chishi-isa metetdaksü.

Chungtia nung AKM 70 buba Inti Mungdang atema mazüngi renemteper

Chungtia, Jan (TYO): Ao Kaketshir Mungdang inti senden January 13-15, 2026 anogo asemnü Chungtia yimtsüng nung amungtsü asoshi maparen balala lemsar kanga mazüngi renemdaki.

Tanü Jan 10 nü osangbener senden ka Chungtia Kaketshir Telungjem Library Hall nung amendang AKM tir, Sb. Lanutoshi Aier aser Chungtia Kaketshir Telungjem tir, Sb. Tsüknungtemsü nadi iba osang metetdaksü.

Tsüknungtemsü-i mapang tatsüka agidang, iba mungdang asoshi Chungtia yimden akhüm nung Chungtia Kaketshir Telungjem-i taoba küm 9 jakdang nungi maparen balala inyaka aruogo, ta ashi.

Iba mungdang nung mungdangsanger (delegates) 1700 pelashishia jaoker aser itemji kibong 700 nung lemsar anendaktsütsü. Nisung 2200 mentettsüsa mungdang ki tobur junga yangludaki. Iba mungdang nung delegate-tem satemsatema jajatsü asoshi bus teperi anepalutsütsü, ta paisa metetdaksü.

Lanutoshi Aier-i jembidang, iba mungdang S. Supongmeren Jamir, Member of Parliament, Lok Sabha-i lapoktsütsü, Nagaland Chief Minister, Dr. Neiphiu Rio tongti tesemdangar asütsü jaoka lir aser T.N. Mannen, Advisor & MLA, Law and Justice, Land

Revenue, Govt. of Nagaland-i mungdang shibangtsütsü sentong renema lir, ta metetdaksü.

Sentong nung Metsübo Jamir, Minister, RD & SIRD, Govt. of Nagaland; Temjenmenba, Advisor & MLA, Transport and Technical Education, Govt. of Nagaland; M. Imkongla Jamir, IAS, Resident Commissioner, Govt. of Karnataka, New Delhi; aser Limasunep Jamir, IPS, Special Secretary, Home, Govt. of Nagaland parnokisa shilem agitsü lir, ta pai ashi.

"Tarutsü Lanusensor: Melenshiba lima ka nung shisaluin, yimden yimsüsüba, tongtepratep, tamangbaren aser shishilembaba tsütsü lensayua aniba", onük nung ajemdaker shisa lemsa (panel discussion) ka akatsü aser iba nung shilem agirtemji - Kr. Imkongnükla EAC Longleng; Er. Lanuwabang, Director, NIELIT, Kohima, Govt. of India; Wb. K. Temjen Jamir, Yimozülur, Tir Yimyim; aser Rev. Dr. Wati Aier, Convenor, FNR par pezü asütsü, ta paisa shisem.

Paisa ashiba agi, tetsü oshi wazüka ayutsü nükjiong nung 'Ao Oshi Ojang Lutet Tetoktepba' sentong temeja ka agitsü aser kaketshirtem dak rangloker tanü tensa den apet onük balala bendena kaket (magazine) ka adoktsü, ta metetdaksü.

70 buba inti mungdang ya "Alizüng Züngkümshiba" omen

dak rangloker akar. Iba tetezü nükjiong masetshi-i tejakleni mera agiba aser züngzünga, kümküma, saksalema aser jerapera-a meita ataba tetezü lir. AKM tenzüker 2029 nung küm noklang ka abensar, iba asoshi atemzüka akaba nükjiong aser alizüngtem ajak tiptema atatsü tebilemba nung taküm iba omen ya shimogo, anungji, mungdangi arur ajak tajangzük karbo ngur aotsüsa pei mulungjang renemshir arutsü ayongzüker, ta paisa ayongzük.

Chungtia yimdeni anir senso nüburtemi mungdang dak sentakba maparen ajak meimlaba dang nungi kanga agi tajungba inyaka aoba asoshi pai pelaba metetdaksü. Iba mungdang nung bangzüng luden ka shima lir, anungji, tensa den apet bangzüng karbosa renemtsü imlar, ta paisa shisem.

Mungdangi marurtetertem asoshi pei kidang nungi reprangtettsüsa sentong ajak AKM Youtube channel nung tagidak yoktsü, ta paisa metetdaksü.

Chungtia ya Nagaland nung yim tejen rongnung ka lir. Iba yim ya Mokokchung town nungi kilometer 15 shi pilar NH-702D anasa lir. Iba yimtsüng nung - Tüvlong, Yimpang Süngküm & Süngküm Api, Yimrongdong, Arijuma Tzütu aser Tongden (Log drum) amala otsütsütsü aketba tesemtem angutsü.

Changki Baptist Arogo quasquicentennial amunger



Honibar aonung Changki Baptist Arogo quasquicentennial lapokba sentong nung 'Living Gospel Band'-i shilem agiba mapang tangokba noksa nung angur.

Changki, Aenjeti/January 10 (TYO): Changki Baptist Arogo January 10 aser 11 nü quasquicentennial mungdar. Khrista yimsü agizüker küm 125 ajungba nungdem nung iba benjungmung ayongzüka amunger.

Iba benjungmung nung Arogo tenzükerterem, Arogo züngsemtem aser yimdaklirtem den jila balala nung alirtem, yimtsüng temeket nung aliba tesemtem nungi tejaokertem adenshia shilem agidar.

Iba benjungmung ya 'Kibuba tenüng uludakjang' omen nung ajemdaker mungdar, kong tanüla, lokti aser tenüangsang agütsüba sentong balala ayongzüka agidar, koba ajanga Arogo amenokba mapang nungi tang tashi jajayonga aruba

indang sayur.

Sentong ya Honibar aonung tenüangsang agütsüba sentong ka agia tenzükerterem, kong Tsüngrem o aser tajungshi o jembiba densema liasü.

Mezüng aonung sentong nung Impur Baptist Arogo Pastor Rev. Dr. Akok Amri-i, Tsüngrem temaotsü indang jembia liasü.

Sentongtem rongnung choir-i ken atenba, sarasadem sentong aser tayongzüka aser tajungshi o jembiba densema liasü.

Benjung tenzüksü lia sentong ayongertemi yimdak tantsütila aser tambusang nem kuli kaket aser sempet agüja liasü. Parnokisa yimtsüng nung arishi küm 80 temapurtem ki semdanga sarasademtsüba den sempet agüja liasü.

Kasa mapang nung Arogo tentetba aser kümtem tsüngda renloka aoba indang sayuogo aser iba ajanga lanurtem nem mezüngpurtemi taküm tenla agüja bendanga agüja inyakba indang angatetdaksüogo.

Tananübuba tenüangsang agütsüba sentong ka agitsü. Iba benjungmung ya tanüla nung maneni renloka aotsü asoshi tanaben bendanga agütsüshitsü, lokti khuret angatetsü aser lokti terenlok atema sabang ka ama asütsü. Maneni nikongtsütsü benjung shibangba sentong agitsü.

Taoba küm 125 tsüngda Changki Baptist Arogo-i tamangba yimsü tsütsü dang masü saka shisaluyim aser yimtsüng nung telongjem asoshi tongtibang shilem agiogo.

Meghalaya nung NGO züngsem ka tepset; nisung 3 puogo

Shillong, Aenjeti/January 10 (Agencies): Meghalaya kübok West Garo Hills district nung Hokolbarnü nikongtsütsü nisung telok kati NGO züngsem ka tepsetogo. Ken o dak sendakba nung police-i nisung asem puogo aser Rajabala constituency kübok Goalgaon yimtsüng nung security akangshiogo.

Tensa tamajungba küma meyoktsü aser temzüng ozüng shitak benoka inyaksü atema district administration-i aonung curfew benokogo.

Asüsang Dilseng M Sangma ya Garo nung lokti tentet Aochik Conscious Holistically Integrated Krima (ACHIK) züngsem ka liasü.

Ketdangsurtemi ashiba agi, Goalgaon nung amakba ACHIK züngsemtem (10-12) rongnung Sangma-a densema liasü. Iba lendong nung ano NGO züngsem ka kanga mejungi yiru. Iba nisungba ya mozükidang temang anepaludar.

Meghalaya Chief Minister Conrad Sangma-i iba tatalokba aitsüogo aser lokti tsüngda yimjung nung alitsü ayongzükerterem. "Police-i tesem balala meitaogo aser tang tashi nung aija alir asem pua lir. Police temi ken

o nung sendaka alirtem maneni bushidar," ta chief minister-i ashi. Pai nüburtem dang yimjung nung alitsü aser ketdangsurtem den teka amteper inyaksü mepeshia liasü.

Rajabala MLA Mizanur Kazi-i ashiba agi, police temi iba ken o ya kanga junga bushisüngdangdar aser aibelena alirtem anema jenjang tesashi agitsü.


"Iba lendong ya kodaser atalok aji tang bushidar. Iba tatalokba ya onoki aitsü aser aibelena alir nem temerenshi tesashitiba agütsütsü akhangar," ta kazi-i ashi.

Paissa, süngjemshitsü mepeshiba den ashiba agi, ACHIK züngsetem ya iba yimtsüng yagi gari ana nung aru aser iba sülen yimdaklir aser iba tesem nung mapa inyakerterem den mangatetep adoka liasü.

"Iba ya jelia sentong yanglura atar inyakba mapa ka masü. Lendong ya ajungbena atalok ama reprangteter. Ajisüaka aitsütsü langa lir," ta MLA-i ashiba den asür kinunger den asükhulemsatetep.

Ketdangsurtemi ashiba agi, tensa mejungi dang lir saka aziokteta lir. Police-i lendong ataloktsü ana nung aliba tesemi sepai tali yokogo.

Nagaland University nungi bushisüngdangertemi süngtong tasen ka ngutetogo



Kohima, Aenjeti/January 10 (TYO): Nagaland University nungi Dr. Gyati Yam-i anir bushisüngdang Vieneite-o Koza and co-researcher Joynath Pegu nati 2023 nungi 2025 küm tsüngda Phek district kübok Khezhakeno yimtsüng nung Kavünhou Community Reserved Forest nung systematic field surveys ka agiba mapang süngtong tasen ka ngutetogo.

Iba bushisüngdang ya lanur faculty tem atema Start-Up

Project ka ajanga Nagaland University-i nongita yaria liasü, aser iba ya nungtugu international scientific journal Kew Bulletin nung publish süogo.

Phek district kübok tenem nung bushisüngdang aoba mapang iba süngtong ya nguteta liasü. Süngtong tasenba Hoya nagaensis (Apocynaceae: Asclepiadoideae) ajanga Northeast tesem nung Nagaland ya koda biodiversity hotspot ka aji tali jangja sayur.

LKM-i 'Smart' aluyimba aser 'Toursim' nung ...

(TAPAK 1 NUNGI...)



LKM ketdangpur tasen purtem asoshi sarasademtsüba mapang agiba noksa ka yangi angur .
(Mongsenyimti , Jan. 09,2026)

Langpangkong songjen nung raliwalirtem monga jajatsüsa 'Toruist Circuit' kümdaktsütsü asoshi, Langpangkong nung yimtsüng shiai pei yimtak aser pei lushi nung yimtsüng kaketshirtemi otsüla oboula mapang nungi tanü tashi nung atalokba , mesemtetba aser tetshiba otsü aser tesemtem mesemteta anepalutsü aser itemji noksa dena bendener 'Tourist Guide Map' küma website nung enoktsütsü LKM tebilemba lir.

Ano, LKM-isa taküm küm nungibo World Environment Day, Alima Lipüküm Anogo, June mezüng hopta nung amongdang yim shia kaketshirtemi pei yim aser pei lushi nung yimküüm tzübo aser ayongtem merükteta amongtsü lemtetogo.

Kasa mungdang nungsa, LKM-i Langpangkong nung school tesayurtem ajak jaoka September mezüng hopta nung jelia Tesayurtem anogo amongtsü aser idangji tesayurtem nem aküm agütsüba den külema

ajungshitep sentong alitsü lemtetogo.

Lanurtem zünger mapa bushir aser kaketshirtem asoshi Langpangkong nung yimtsüng aser town shia 'Study Space' kaka mesemtetsü aser iba sentong ya arogo aser yimten den külema yaritepa inyaka aotsü LKM-isa lemtetba liasü.

Ano, LKM-isa alima yimten yanglushiba anung "Clean Election campaign" maneni aotsü akangshia lemtetogo. Iba sentong nung Pei Vote, Pei temeten tangatetba nung election maparen nung tashiyim aser sen mamshitsü aser senso ajaki election nung timi shilem agitsü ajungshitsü ta LKM-isa metetdaksü.

Iba mungdang tatembang anogo sentongtem nung tongti tejaoker, Mr.A.Pangjung Jamir, Hon'ble Advisor, Fishries & Aquatic Resources, Govt. of Nagaland liasü aser shisatokden onüktem nung Wb. K.Temjen Jamir, Yimozülur, Tir Yimym aser Er.Lanuwabang, Director, NEILIT, Ministry of

Electronics & IT, Govt of India na liasü. Iba shisatokden sentong nung menden Washimong Sadem Longkumer aser onir Imnatula Jamir liasü.

Iba kasa sentongtem nung Ao Kaketshir Mungdang AKM) tir, Lanutoshi Aier; Japukong Kaketshir Mungdang (JKM) tir, A. Mangyang aser Tzürangkong Kaketshir Mungdang (TKM) tir, Pangertoba nungertemi tepela o lemsatetba liasü.

Kasa sentong nung T.Sentiyala Ozüküm aser Langpangkong Watsü Telungjem nungertemi ken tajung tena mungdang lemladaksü.

Mungdang tesüsa sentong nung Ao Senden tir Wb, Marsanen aser Langpangkong Tzükong Mungdang (LTM) tir, N.Watitoshi nati tajungshi o jembi aser Local Planning Committee convenor, Imotong aser LKM Planning Committee Convenor, Lanu Pongen nati tepela melepzüng o metetdaksü. Iba mungdang sentong ya taruba mungdang anitsü nangzüker Unger Kaketshir Telungjemi saya tajung sayua tembang.

Iba mungdang nung ano 2026 nungi küm asem LKM len anitsü atema ketdangpur tasen itemi shim : President Tzüwasanen Jamir, Vice president Merenkümzüker , General Secretary Walunir, Assistant General Secretary Shiluyatet, Games & Sports Secretary Sujimong, Asstt. Games & Sports Secretary Imnasüngküm , Cultural Secretary Talisunep aser Finance secretary Angumtoshi.

Labour Commissioner Department-i metetdaksür

Dimapur, Aenjeti/January 10 (TYO): Department of Labour Commissioner-i sangdong ka ajanga, Ministry of Labour & Employment, Government of India-i 2025 küm April 15 aser October 17 nü sangdongba ama Employees' State Insurance (ESI) Scheme ya Nagaland nung district ajak nung 2025 küm May 1 aser November 1 nü benokogo.

Anungji teküboklen agüja aliba establishment tem indang Employer shirnok kübok mapang inyaker 10 mesüra iba dak tema lir, parnok dang parnok indang establishment den employee tem January 31

nü tashi nungbo züngoksemtsü metetdaksüogo.

Establishment tem:

- I. Shops
- II. Hotels
- III. Restaurants
- IV. Road Motor Transport establishments
- V. News paper establishments
- VI. Private Educational Institutions
- VII. Private Medical Institutions

Osang tejangjaba aagitsü atema Chief Executive Officer ESI Scheme Nagaland (8794680886) mesüra Asst. Director, ESIC Camp Office, Dimapur (8011794098) den tongtepratepsü metetdaksüogo.

Odisha nung tayimtsü tilaka tsükokba lendong nung nisung 6 yiru



Bhubaneswar, January 10 (Agencies): Honibarnü Odisha state kübok Rourkela anasa tayimtsü tilaka tsükokba lendong nung nisung trok yiruogo.

Tayimtsü nungji pilot ana den passenger pezü liasü, aser iba lendong nung par trokprongla yiruogo, ta ketdangsertemi metetdaksü.

IndiaOne Air indang tayimtsüji Rourkela airport atongtsü kilometer 15-20 shi dang lia tayimtsü nung timtem adokba ajanga ajungbena anendang tsükok.

Cessna Grand Caravan 208B tayimtsüji state yimtiba, Bhubaneswar nungi Rourkela-i aoba mapang iba lendong atalok. Iba tayimtsüji nikongdang 12:25 ako nung Bhubaneswar nungi apusoa liasü.

Nikongdang 1:14 ako meta pilot-i Rourkela ATC nem tayimtsü gol nung timtem adokba osang metetdaksü aser 1:20 ako meta pilot ana jagi Jalda/Kansor nung aliba moapu

ka nung anendaktsü dang tsükok.

Ketdangsertemi, pilot ana jagi tayimtsüji junga azüokteta anendaktsüba ajanga yiruba dak alaka taküm mesama, ta metetdaksü.

Iba lendong atalokba osang angashiba sülen district administration iba tesem jagi tonga oa yirua alirtem ajakji Rourkela nung aliba hospital-i anir ao.

Ketdangsertemi ashiba agi, tang passenger asem JP Hospital nung treatment agidar aser pilot ana den passenger ka Rourkela Government Hospital (RGH) nung treatment agidar.

Iba lendong atalokba osangji Directorate General of Civil Aviation (DGCA) aser Aircraft Accident Investigation Bureau (AAIB) nem metetdaksüogo. Aviation temzüng kübok IndiaOne Air-i osang tejangja agütsüba sülen bushisü ngdang tenzüksü.

Odisha Commerce and

Transport Department kübok Directorate of Civil Aviation-i iba tensa asadangdar aser district administration-i nungdakba teyari ajak agütsüdar.

Odisha Chief Minister Naveen Patnaik-ia iba tensa asadangba sülen ketdangsertem dang passengers, pilot aser ketdangsertem nem nungdakba teyari ajak agüjjang, ta tuyu.

Commerce & Transport Minister Bibhuti Bhusan Jena-ia iba tensa asadangdar.

Osangbenertem den jembidang minister Jena-i, iba lendong nung nisung trok yiruogo saka tangbo parnok ajak junga lir, ta metetdaksü.

Paisa nüburtemi maoksatsüla, kechiyong tarutsü nungbo item ama tatalokba malitsü atema ketdangsertemi inyaktsü, ta metetdaksü.

Iba lendong dak sendakba nung tang tashi nungbo IndiaOne Air-i sangdong kecha magütsü.

January 28 nungi Parliament nung budget senden tenzüksü

New Delhi, Aenjeti/January 10 (Agencies): January 28 nungi Parliament nung budget senden tenzüksü aser February 1 (Amongnü) budget benoktsü.

Parliament nung budget senden tenzüksü sentongji Cabinet Committee on Parliamentary Affairs-i agizükogo, January 28 nü linük Tir, Droupadi Murmu-i Parliament House anaprong külem senden nung jembiba sülen budget senden tenzüksü.

Parliamentary Affairs

minister Kiren Rijiju-i, Parliament Budget senden ya shilem ana lemsar January 28 nungi April 2 tashi amentsü, ta metetdaksü.

"Parliament nung Budget senden 2026 ayongzüksü atema India sorkar, India Tir, Droupadi Murmu-i agizükogo. Sendenji January 28, 2026 nü tenzüksü aser April 2, 2026 tashi amentsü," ta Rijiju-i X ajanga metetdaksü.

January 29 nübo Parliament senden mamentsü aser ibaji

Beating Retreat ceremony ajanga lir. House anaprong January 30 nü amenba mapang nung Economic Survey-a benoktsü aser January 31 nüa Lok Sabha aser Rajya Sabha naprong senden mamentsü.

Tiri onük jembiba nung ajemdaker o lemtetba aser Union Budget benokba sülen February 13 nungi ita ka jungnüa Parliament thinentsü. Iba sülen tanabuba shilem tenzüksü aser April 3 anogoji Good Friday asüba agi April 2 nü tembangtsü.



January 10, 2026 nü Kolkata nung BJP lenirtem- Indranil Khan, Phalguni Patra, Locket Chatterjee, Shashi Agnihotri aser Shishir Bajoria nungeri West Bengal Angh, CV Ananda Bose ajurua senden amenba sülen meyipa aodang tangokba noksa nung angur.

Telangana nung DCA-i Almont-Kid aket mozü nokdang

New Delhi, January 10 (Agencies): Honibarnü Telangana Drugs Control Administration (DCA)-i nüburttem dang tanurtem nem Almont-Kid Syrup aket mozü mejemdaktsütsüla, ta tekümdangtsü osang ka metetdaksü.

Almount-Kid Syrup nungji Ethylene Glycol (EG) keta aliba putetba sülen ketdangsertemi tekümdangtsü osangji metetdaksü.

DCA-i ashiba agi, East Zone, Kolkata nung aliba Central Drugs Standard Control Organisation (CDSCO)-i laboratory tetendangba nung ajemdaker iba mozü - Levocetirizine Dihydrochloride

and Montelukast Sodium Syrup nung EG keta aliba metetdaksü.

"Iba osang nungji ajemdaker nüburttem dang iba mozü amshiba tangsa anenang ta metetdaksür, aser nenok ket nung iba mozüji lira tekeraba nung anasatiba Drugs Control Authority nem metetdakjang," ta DCA-i metetdaksü.

Ethylene Glycol nung miim keta lir aser iba ya industry nung amshiba chemical ka lir; aser iba ya jemra temang nung timtem tulu adoktsü akok.

DCA-isa, iba aket mozü (Batch No.: AL-24002) ya Bihar nung aliba Tridus Remedies-i yanglur, ta metetdaksü.



Kolkata, January 09, 2026: Enforcement Directorate-i I-PAC office mita aoba anema Hokolbarnü West Bengal Chief Minister aser Trinamool Congress (TMC) tongti, Mamata Banerjee leniba nung longkak aita jajadang tangokba noksa nung angur.

Odisha nung aou agi yangluba osettem ayoktsü atema website ka tenzü

New Delhi, January 10 (Agencies): Odisha nung aou agi yanglutetba oset balala online ajanga ayoktsü atema state sorkari website ka sangdongogo.

www.odishabambooha.com ajanga linük aser international level nung teka mapa inyaktertemi aou agi yanglutetba osettem ayokba jenjang ajungkettsütsü, ta state sorkari metetdaksü.

National Bamboo Conclave 2026 nung jembidang Odisha Minister for forest, environment & climate change, Ganesh Ram Singkhuntia-i iba osangji metetdakja liasü.

Iba conclave ayongzüka akaba nükjiongji Odisha nung aou sector ya state green economy nung tongtibang kümdaktsütsü atema lir.

Hokolbarnü One Future Foundation-i ayongzüka sentong nungji nisung 200 dak tali aden. Iba sentong nung shilem agirtem rongnung atema skill development & capacity building nungdak ta bangjemba den aou dak sendakba micro & small enterprises ajungkettsütsü, market tesendaktep tuluba akümtsü aser scientific yimya nung aou tsünutsü atema jembiogo.

Iba sentong nungji jembidang state forest minister-i, iba sentong ya senden ka dang masü saka state nung aou industry ajungkettsütsü atema longjemer inyaktsü asoshi lir, ta ashi.

"Iba sentong nung shilem

agirtem rongnung shisa lemsatepba ajanga Odisha nung aliba yimtsüngtem rongsenkettzüng jenjang tajungba akümtsü aser taküm alitsü atema aou ya tongtibang kümdaktsütsü," ta paisa metetdaksü.

Iba sentong nungji anogo shia lenmang aisü nung aou amshiba jenjang tali angatettsü aser global sustainable development goals atalokba nung tongti shilem agidaktsütsü atema shisa lemsateptsü asoshi liasü.

Technical sessions nung sorkar mapatong balala, aou technologies aser supply value chain tashi itshitsü atema o lemtepa liasü.

Mongintemi, aou ya eco-friendly süngdonglidong ka dang masü saka talisa yimtsüngtem aser tribal nisungtem atema sen aatsü aser mapa anguba lenmang ka lir, ta ashi.

Iba senden nungjisa teka mapa inyaktertem aser entrepreneurs atema skill development & capacity building nungdak ta bangjemba den aou dak sendakba micro & small enterprises ajungkettsütsü, market tesendaktep tuluba akümtsü aser scientific yimya nung aou tsünutsü atema jembiogo.

Ketdangser kati, "Odisha nung aou agi osettsüset balala yanglurtem, tetsür self help groups aser micro-entrepreneurs ajanga yimtsüngtem rongsenkettzüng nung shilem tulu agir," ta metetdaksü.



TIR YIMYIM YIMOBILEM (EDITRIAL)

DIMAPUR AMUNGDAY, JANUARY (AENJETI) 11, 2026

Asenok nüngdak

Alima nung lia aotsü atema asen nüngdak aika lir. Item nüngdaktemji kong nungi angutsü ta asenoki shisabolur. Item nüngdaktemji bushidang asenok kanga anibelem aser taia menar saka aiben mataloker. Iba ama shisabolu nung asen nüngdak ashidak aser meshidak maka asenok timatemer. Ajisüaka, Laishibai ashir, Tsüngremi Pa akaba yari asenok nüngdak ajak agütsütsü. (Filipi 4:19). Tsüngremi anüng aser alima aser yangji aliba ajak yanglu ta asenoki meteta lir. Aji oda, alima aser anüng nung akaba rongsen ajakji Pa meyong. Asenoki alima nung takartiba Computer agi mapa tapu balala inyaktsüsa yanglutetsang, Microsoft Corporation nung mendenbuba Bill Gates akaba indang meteta lir. Par rongsenji America nung sen dollar billion 46.6 dak tali lir. Kenü anogo asen dang Bill Gates-i taküm piyong asen nüngdak ajak agütsütsü ta nangzük ka asünunga, asenok atema koda temoatsü aser anisüngzük süla, asenok kodaka pelala. Aji oda, asen lima nung, asen yimtak mesüra asen kiyong nung takar kati asen dang kodangsa asen nüngdak adokdir, asen nüngdak ajak pari agütsütsü ta nangzük nunga koda tepelatsüka asütsü. Ajisüaka, Tenyar Paul-i Filipi nungertem dang ashiba asen Tsüngremjibo alima nung takartiba Bill Gates akaba den medemdangtsü makok. Paji asen Tsüngrem. Kotakji Pa menden aser alimaji Pa tetsüng ajemetdak. Asen Tsüngremji Bill Gatesw ama akaba den atishiteptsüla Tsüngrem masü. Bill Gates akabaji Tsüngrem tsüngdang kanga ilara asütsü aser Tsüngrem akabaji asenok atema tesüngmangtsü. Iba ama alima aser anüng ajak madak kibur aser takar Tsüngremi pa akaba yari asenok nüngdak ajak agütsütsü ta nangzük lir ser nung, asenok nüngdak menguteti timatemsübbaji asenoka shiba asütsü ta asenok nüngdak matalokdang bilemdangtsübbaji kanga tim asütsü. Asen Tsüngremi asenok senotsü nüngdakbaji meteta lir. Asenok chirnurtem nüngdakji Pai meteta lir. Asenok kibong nüngdakji asenoki Pa dang masüngdangdangyongi Pai meteta lir. Asenok taneptsü nüngdakbajia Pai meteta dang lir. Ajisüaka, kenken asenoki asen nüngdaktemji mengutettsü ama shisabolur. Idangji asenok teimla samar aser mashilen nungi asenoki asen nüngdak abensadaksütsü meranger. Ajisüaka, Laishibaisa ashir, asenoki memeshidangyongi, Tsüngremi asenok kechisa nüngdaker, item ajakji meteta dang lir. (Mathi 6:8). Aji oda, meshiang aser aji nenok nem agütsütsü ta nangzükba Tsüngremji asenoki amangba Tsüngrem ya lir. Ajisüaka, asenoki asenok aginüba o asenok nüngdakba na bendangtettsüla. Tsüngremi asenok aginüba ajak agütsütsü tabo menangzük saka asenok nüngdak ajak Pa akaba yari agütsütsü ta ashir. Aji oda, aiben asenoki asen nüngdak masü saka aseni aginüba apia meshia alitsüa akok. Ashiko asenok nüngdakbajibo tetsüng-teben tajung asütsüa akok ser nung asenoki gari meshira, ashiko ibajibo mangutsüa akok aser anguyonga jangratemabo mamshitetsüa akok. Yakobi ashi ama, asenoki aiben asenok nüngdak nung amshitsü asoshi masü saka shi azü jangratem nung amshitsü atema meshir. Ashiko, iba jagi asenoki Tsüngrem dang nüngdaka meshibaji magütsür asütsüa akok. Asenoki amangba Tsüngrem ya kiburtem madak kibur aser tsüngremtem madak Tsüngrem, Pasa takaba, tuluba aser tematiba. Pa alema shinga mali aser Pa makatsü kecha maka. Aji oda, asenok ya iba Tsüngrem chirtemji lir. Tetezü asenok ya chuba chir aser takar chir. Ajisüaka, asenok aika takar chir memesük kanga okrongseta alir aser chuba chir memesük tangar lar kümer meshimetsüa dang lir. Aji oda, kechiba asen nüngdak mengutettsüsa asenok alir, ibaji asenokia kenkenbo bilemdanger asü. Atangji, Pai asen nüngdak ajak meteta lir aser item ajakji asen takarsang Tsüngremi Pa akaba yari agütsütsü. Asenok mapa ajunga agi, Pa dak amangtsü aser asen nüngdakbo ajak Pai agütsütsü. Tanü asenok atema osangtajungji ibaji asütsü.

OLEMSABANG

Asenok küm tasen ka nung ayaokogo

~ L. Kika Pongener.

(Yashi adok nungi...)

Sorkar : Asen Naga lima nung yimsusuba yayim kanga junga reprangdangra; Democracy yayim nung yimsu asüba linuk masü; nisung kati mulungba nung yimsu asüba linuk ka mesuka küma odagi. Ibaji tanga kecha agi masü sorkar nung opposition Bench makaba agi asütsü. Sorkar ka nung opposition malibaji tongtipang shilem 'Tongtoret' maliba amai lir. Atangji, tanü asen Naga nung sorkar yimsusuba inyakyim reprangdangra....Manganutsü mali, nisung kati pai mulungba nung yimsu asüba linuk ka mesuka kümogo. Lenisangi kechi ashir; iba nungji tatar ajaki ola madoki 'Hau-Hai' ta anidakba sorkar ka kümogo. Assembly amendanga nunga ta ashishir kata maliba agi; mapang magi-i mapang tatsüka nung Assembly Session tembanga-adoker. Ibajagi asen lima aser nuburtem lenmang aisu nung akoksar ta nuburtem-ibo kangasa sasa-a biemer. Ajisuaka, nuburtemi meyongnem agüja shimtetba yimsusurtemi aji hau ta mali, pei yangkü asüngtsü dang bilemer sudi ta nuburtemibo bilemer. Tanü asen lima nung terenlok mapa inyakba reprangdangra....Mapa tasen tenzüka inyaktsü long azüngba-bo (Foundation Stone Lay-out) aika angur....Saka mapa renemer semzüka (Inauguration) asüba-bo kanga ajema angur. Mapa karbo putu ana dak tali songdema merenemi ayuba angur....!!!??? Dimapur nung Stadium ka yanglutsü tenzüka joko putu ka dak tali songdema merinemi ayuba agi nisung khasetdak tesem ka kümer menentoka yua lir. Ano Kohima nung High Court Complex yangluba mapa; tanü tashi merinemi anendaka yua lir....!!!??? Ashiko, tanga mapa-a karbo iba amaji küm aika merinemi senzüka tokja alitsü akok. Anungji 2026 küm ya asen lima nung merinemi anendaka yua aliba mapa renema inyakba küm ka sudaktsüdi.

Nujiso mapa : Tesasatsüka, asen Naga nung nujiso bushiba mapa ya aposhia-aposhia aposep amai küma oadagi. Nujiso atema tatempang telemtetba agitsüba ya...."Sorak-lang nung attsüba tanen maka mesanga aoba" amai dang kümogo". Aji oda, nujiso bushiba mapa ya kodangang telemtetba kati arutsü'ar nuburtemibo ongko madokteti kümogo. Asen lima nung General Election agiba shia; Sorkar kümli-i nujiso mapa tatempang telemtetba ka agitsü ta nubur dang nangzüktsü. Ajisuaka, kodang Election temer sorkar Formed sur odir; mapa küma inyakba tanü tashi tsüngsu kecha mangur; kechiyung General Election ana-asem sua ogo; saka yimsusurtemi mapa küma inyakba tanü tashi kecha tsüngsu mangur. Ano asen Naga nung nuburtemi kanga nemjema bilemba kaji....Nuchiso bushir telok (Faction) aika küma lemsaba yagi; aser nukjidong balala asüba agi tatempang telemtetba kati arutsü mapang talangka agir sudi ta kanga nemjema bilemer. Jokorla, nuburtemi nujiso bushir karbo; nujiso masü rongsen-ang bushir asü (?) ta mebendangteter....!!! Mesura karbo nujiso tenung ademer nubur dak rakzükraktemtsü nukjidong-ang asü (?) ta sungmanger....!!! Mesura nujiso mapa ya tepok mesutsüba (Employment) mapa ka dang küma-adok asü (?) ta shisadanger. Hau-niiii....linuk tenzüker aika ochishia nujiso mapa nung taküm aser mapang ajunga bendanga agütsür tenzüka angudang; nuburtemi item lennirtemjibo kanga akümstübur. Ajak dang alia, nujiso bushirtem telok aika küma lemsaba ya; ka küma longjemtsüla aser nukjidong ka dang asütsüla. Anungji 2026 küm ya nujiso mapa tatempang telemtetba agiba küm ka asütsü ajungshir.

Nubur Ola: Tanü asen Naga nung nubur ajunga taginubaji....Telok ajaki pei nukjidong kechi (?) Mesura pei telok teinyaktsü mapa kechi (?) Ibaji inyaktsüba dak alaka; telok katia tangar mapa nung tebang maitsüla aser teka amuoka tashi mamshitsüla. Alima asünungji temzüng-ozüng lateta yua liaka, tashi mangarji karbosa alitsü; itemji azüoktsü sorkari ayuba mitkar/ozüng ammertem lir; parnok nemji azüoktsü aser merenshitsü bendanga toktsütsüla. Ozüng alema Business Establishment tapu-tapu tenzüka/lapoka inyaker-a alitsü akok; itemji azüoktsü aser merenshitsü bangdak lir; aser obendangdak sabang (Court) lir. Anungji parnok nem bendanga toktsütsüla. Seno-tsü apotepba aser sentsüh-ludem mangatettepba ken o alitsü akok....Ibala ken o angatettepa inyaktsü senmanger lir; kin-kidong lir; yimtsür-yimer lir; senso-sanger lir. Anungji parnoki angatettepa inyaktsü atema parnok nem yutsütsüla. Item amala ken o nung nujiso bushir, linuk tenzüker tebang yia; teka amuoka; nuken belema shilem magiba tajungba asütsü. Linuk tenzükertemi indang-indanga pei nukjidong ataloka; takok angutsü meranga inyakba tajungba asütsü. Yamaji lokti-tentet ajungai pei telok nukjidong nung rangloker; iba nungji takok angutsü meranga inyakra; asen lima yimjung nung sunepa alitsü.

Kanga tesasatsüka, tanü asen nubur aikati nungsen tsübuba agi; mesura amokmeren tsübuba agi tasü-ita ochi ola madokteter; ibajagi asen lima aser nuburtem asükdemer. Aji oda, nisung kari nungsen metsübu aser pei taküm samatsüa metsübu; tasü-ita ochi ola madokra; asen lokti teraksa ya meyanglushitsü aser asen lima memelenshitsü. Meshitak aser majung sernung anemsu agi junger-junger ta tenungsangtepba agi asen lokti meyanglushitsü aser asen lima memelenshitsü. Anungji 2026 küm ya asen sorkar, yimden, arogo, mungdang aser lokti meyipa reprangshiba/yanglushiba aser linuk tenzükertema ka küma longjemba aser nukjidong atalokba küm ka sudaktsüdi ta ayungzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran Christian alliance-i ketdangsertem dang atsü-anem akatsü mepishir



Iran yimtiba, Tehran nung longkak aiterterem telok ka noksa nung angur.

January 10, 2026: Iran nung tesüiba anogo aika longkak aita aruba mapang nung Iran nung Khristan lenirtemi nüburtem dang sarasademtsü aser sorkar ketdangsertem dang atsü-anem akatsü mepishiogo.

World Iranian Christian Alliance (WICA)-i, Iran nung tesünep nung longkak aiterterem ola nembangtsütsü atema ketdangsertemi tashiyim amshir, ta aitsü.

Iran nung December 28 nü nüburtemi longkak ait tenzüka liasü, aser tangbo yimti 100 dak tema nung nüburtemi longkak aiter aser tang tashi nung nisung aika süogo.

Tan hopta WICA-i sangdong ka ajanga, sorkar ketdangsertemi tashiyim amshiba atema onoki tebilemstü akar, ta metetdaksü.

WICA-isa, sorkar ketdangsertemi longkak aiterteremji ozüng alema inyakterem ama züngshir, ta tai tongloksü.

"Yimjung nung longkak aittsüji senso ajak temeden ka lir. Longkak aiterterem yirutsüba aser longkak aiterterem kiojen raksatsübaji tim masü," ta WICA-i metetdaksü.

WICA-isa, osettsüset/chiyungtsü nung jenjang kanga atuba aser linüktemi rongsenkettzüng tsütsü Iran anema tenokdangba balala benokba ajanga Iran nung nüburtem libaliro taküm jenjang kanga mejungi kümogo, ta metetdaksü.

WICA-isa, "Onoki yimtenren tsütsü shinga pu-

masemer, ajisüaka Iran ketdangsertem dang sensotem taküm akhümket akümtsübuttsü aser longkak aiterterem songtemtsü atema tesüiba mapangtem ama tashiyim mamshitsü mepishir," ta metetdaksü.

WICA-isa longkak aitba mapang asür kibongtem den mangyim jashi lemsatepba den külemi linük nung Khristantem dang maneni sarasademtsü, meyipa reprangshitsü aser shisa kaa inyaksü mepishia metetdaksü.

Human Rights Activists News Agency (HRANA)-i ashiba agi, December 28 nü Iran nung longkak ait tenzüka sülen tang tashi nung nisung 62 süogo; asürtem rongnung longkak aiter 48 aser security sepai 14 lir.

ANOGO ABEN TSÜNGREM DEN PA OCHI O TESENDOK

Kari alima shisatsi metetba amajok agi, aser ashikülak meimchir sangrasangji otsü amato, koba Khrista amato masi saka alima tenzüka amato, item yagi nenok anisemer moudaktsütsü kümdangang. ~Kolosi 2:8

Pauli Tsüngrem O tamendakdak sür ochi o tesayuba dak alaka tanga kecha sangrasangjia mesayu. Pai teyazü kuli gütsür den toktepa itemji metongshitsütsü memerang mes?ra parnok taituteta mesayu. Saka ochi tesayuba tungdang akang akanga noktak. Kechi koma sür arogo achi tesayuba nung amendaker tanela nung renloka aotsü haji dang pa nükjidong liasü. Kechiyong Tsüngrem o nung tera yangerloka alinung dang arogo tanela nung tain küma tutitang balala ajangshidang itemji kokteta aotsü ta pai tejangja meteta liasü.

Kasaji, tanü asen tensa reprangra tenyar Paul mapang den kecha tepila mali. Temenen tetendangba, teyazü tesayuba, sülen jajar jenti kümogo. Alima temenen tatsüba balala agi kokdaksür, kija kibong tanela terenlok kecha makai, samaa aoba tamanger onsara. Ya ajaki ken aroka shisadangtsü mapang tongja tongogo ta bilemer.

Temeimbatem, Pauli kolosi arogo ajungshiba kasa o agi äsenoka ajungshidaktsüdi. Pa o nung tera yanga alima Lemenen, alima sangrasangji ajak nungi jenbua litetsü asoshi, Pa ochi o agi nangri kanger taküm shia alitsü ayongzüker. Amen

Khristmas mapang Khristantem amakba NE state temi aitsür

January 10, 2026: 2025 küm Khristmas mapang nung India tesem balala nung Khristantem amakba atema Khristan organisations aser Northeast state temi sashia aitsüogo.

2025 küm India tesem balala nung Khristantem anema inyakba tatalokba 700 dak tali liasü, ta United Christian Forum-i metetdaksüogo.

Khristan telok aikati shidi ajanga Ato kilonser Narendra Modi den iba tebilemstü onük lemsatepogo aser Mizoram, Nagaland den Meghalaya state tem nungi organization aikatia Khristantem amakba aitsüogo.

December 28, 2025 nü Mizoram Home Minister K Sapdanga-i, Khristantem amakba ya India nung secular aser democracy atema amokmeren lir, anungji item ama tatalokba ya sashia aitsütsü tetemsü, ta metetdaksü.

Paisa, December 24 nü Assam kübok Nalbari district nung telok ka St Mary School telungi ia Khristmas benjung sübotsü raksatsü aser sentong tagidak mapang timtem agütsüba aitsü.

Nagaland nunga organisation aikati Khristmas mapang Khristantem amakba aitsü. Nagaland Pradesh Congress Committee-i telok balalai Khristmas mapang tamangertem nem timtem agütsüba aser tsübudaktsüba tatalokbatem aitsü.

National People's Party Nagaland unit-i, item ama osang ya tejashitsüka lir, ta shia item tatalokba jungjunga bushisüngdangtsüla, ta takhangba agütsü.

Naga People's Front-ia Khristmas benjung sübotsü raksatsüba aser tekülem tagidak mapang timtem agütsübaba tatalokbatem aitsü aser ketdangsertem dang yimjung aser tesünep alitsü atema telemtetba agia inyakdaksüner, ta takhangba agütsü.

Global Naga Forum-i, Khristantem atema tongtibang anogotem nung Khristantem amakba ya marezmüktetba agi lir, ta aitsü.

Meghalaya nung Meghalaya Pradesh Mahila Congress-ia Khristmas mapang Khristantem amakba aitsü. Shillong Archdiocese nung Vicar General, Richard Majaw-i, item ama tatalokba ya yimsü anema inyakba lir, ta ashi.

National People's Party's Meghalaya working president Hamletson Dohling-i, Khristantem anema inyakba state sorkar tem dang item ama tatalokba nokdangtsü atema inyakang ta shidi zülutsü atema party-i Meghalaya state sorkar dang mepishitsü, ta ashi.

BJP Meghalaya unit nung

otongdar Mariahom Kharkrang-i, Khristmas mapang Khristantem amakba ya tejashitsüka lir aser item tatalokba ajanga linük tenüng menüktsür, ta ashi.

Ano Mizoram Pradesh Congress Committee-ibo item tatalokba atema BJP nem tai tongloksü. State Congress Tir Lal Thanzara-i, RSS, Bajrang dal aser VHP ama BJP den affiliate süa aliba organization temi Khristmas mapang timtem agütsü, ta aitsü.

Paisa, 2024 küm nunga India nung Khristantem anema inyakba tatalokba 834 liasü aser 2025 küm nungbo teimba aküm, ta ashi.

January 2, 2026 nü Arunachal Baptist Church Council-ia yimjak nung shidi ka ajanga Bareilly (Uttar Pradesh), Kerala, Lajpat Nagar (Delhi), Raipur (Chhattisgarh), St Mary's School Nalbari District (Assam) aser Rajasthan tesem balala nung Khristantem anema inyakba tatalokbatem Ato kilonser Narendra Modi nem metetdaksü.

January 2 nü All India Catholic Union-i sangdong ka ajanga, 2025 küm January ita nungi November ita tashi nung Khristantem anema inyakba tatalokba 706 liasü ta United Christian Forum-i jangjaogo, ta metetdaksü. Item ama

tatalokbatemji Uttar Pradesh nung 183 liasü aser Chhattisgarh nung 156 liasü, ta parnoki metetdaksü.

January 5 nü Nagaland Baptist Church Council (NBCC)-ia shidi ka ajanga yaküm January nungi October tashi nung Khristantem anema inyakba tatalokba 600 dak tali aliba (United Christian Forum data) osang Ato kilonser den lemsatep.

NBCC-i, "India ya alima nung democracy linük tulutiba ta tenüng agir, ajisüaka Khristmas amonger sensotem dak tashiyim inyakba ya iba denji khenyongi meputeper. Item ama tatalokbatem ajanga peii melunba yimsü amangtsü temeden ya mataloktsü mangdang ka ama kümogo," ta metetdaksü.

Ano külen BJP nungi dena Khristan yimsüsürtemi item tatalokba aser tesempa o jembibatem anema ola madokba ya aitsür ta parnokisa ashi.

"Bareilly (Uttar Pradesh), Lajpat Nagar (Delhi), Raipur shopping mall (Chhattisgarh), St. Mary's School Nalbari (Assam), Kerala aser Rajasthan nung Khristantem anema inyakba tatalokbatem liasü saka Khristan yimtenren lenirtemi ola madoker," ta NBCC-i ashi.

"Khristan ka aser India senso ka ama tanü onoki tamangba yimsü tsütsü reshikangshi ajuruba atema kanga aoksar. Khristantem sempatsü atema yamai inyakba angudang kanga ratar, kechiyong linük yangerba tsütsü Khristantemi shilem agibaji reprangdangra onoki linük security, rongsenkettzüng, sobaliba aser yimtenren yangerba nung shilem tulu agia arur," ta NBCC-isa metetdakja liasü.

December 29 nü Khristan denomination balala nungi nisung 6,000 shi Chennai nung adenshia ecumenical summit 'Tabor 2025' agia liasü. Iba summit omenji "Christianity: Yesterday, Today and Tomorrow," liasü aser iba summit nung Khristantem loktiliba-rongsenkettzüng aser yimtenren tashi itshitsü aser linük temzüng kübok agüja aliba temeden balala kümzüksü atema jembia liasü.

Iba summit nung o jembirtemi India nung shisaliok, healthcare, sobaliba aser terenlok tsütsü Arogoi tongti shilem agiba indang metetdakja liasü. Commission for Ecumenism, Tamil Nadu Bishops' Council Chairman, Lawrence Pius-i, "Asenoki shinga anema menokdaker. Asenoki telongjem aginer aser temeim ajanga asenoki item nükjidong atongtsü," ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Tsünüonü**

(adv) tangari tamajung jembitsüba agi tia mejungi akümba (meet misfortune after contempt by others)

* Asen taküm nung tsünüonü mekaotsüsa kümdanga alitsüla.

Tsünüsempongtsü

(n) aonsutsü lanu mapang (seedlings)

* Tsünüsempongtsü meyiba mapang tzü peria agütsütsüla.



Tir Yimyim

OLONG PAITEP # 7380

1				2				3		4
5		6								
							7			
8										
										9
		10					11			
				12				13		
14										
						15				
16										

TIPIEN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A ____ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S ____ k

-(3)

14. T ____ r


-(3)

OLONG PAITEP # 7379 TELANGZÜBA**TIPIEN :**

1. Karanur, 5. Entsü, 6. Lan, 9. Agi, 11. Akong, 12. Ain, 13. Tasen, 14. Oru, 17. Ati, 18. Kensü, 19. Khrista.

LANGTSÜNGLEN :

2. Amang, 3. Repranger, 4. Osü, 7. Tajangzük, 8. Rogo, 10. Itsü, 15. Ratet, 16. Sen.

NAI-A YA METETTER

National Highways Authority of India (NHAI)-i Guinness World Records ana ngutetogo aser ibaji January 6, 2026 nü Bengaluru-Kadapa-Vijayawada Economic Corridor nung Vanavolu-Vankarakunta section nung Bituminous Concrete enokba atema lir.

Six-lane Bengaluru-Kadapa-Vijayawada Economic Corridor nung ghonda 24 nung khen danga maneni 29 lane kilometer nung Bituminous Concrete enokba aser ghonda 24 nung Bituminous Concrete teimtiba enokba indang otsü tasentem yangluogo.

Iba osang ya Andhra Pradesh Chief Minister N. Chandrababu Naidu-i metetdaksü aser Union Minister Nitin Gadkari lenisüba kübok India sorkari highway development nung temulung kanga agütsüba atema pelaba ashi.

Babina healthcare facilities ajanga Manipur journalists yaritsü

For Journalists
BABINA Increases Care

- ✓ **20% Treatment**
Discount for Journalists (Increased from 10%)
- ✓ **Continued Support**
30% diagnostic concession at BABINA Diagnostics
- ✓ **A New Year Goodwill Gesture**
Effective Immediately

Visit us → www.babinahospital.com | For appointment call 690-939-0666 or 1800-345-3811

Dr. Thangjam Dhabali Singh
Managing Director

Imphal, January 10, 2026

(Agencies): Manipur nung amenoka aliba Babina Group of Companies ajanga state nung journalists yaritsü metetdaksüogo.

Babina Group indang medical facilities nung Manipur journalist nem subsidised diagnostic aser hospital treatment agütsütsü.

January 9, 2026 nü Khabeisoi, Imphal East nung aliba Babina Multi-Speciality Hospital nung

osangbener senden ka nung iba osang metetdaksü.

"Babina-i lapoka aliba facilities nung Manipur nung journalist temi diagnostic services atema 30% concession aser hospital treatment atema 20% concession angutsü" ta Babina Group of Companies Chairman & Managing Director Dr Thangjam Dhabali Singh-i ashi.

"Journalist temi public nem osang sangoktsüba aser talisa

Manipur ama tensa mejungi aliba state ka nung inyakba atema iba lemtet agi. Tejakleni aotsü aser terenlok atema osangtsüsang meteta aliba loktiliba ka nungdaker aser tensa tamajung nung media-i shilem tajung agiba atema teyari agütsütsü langa lir" ta Dr Thangjam-isa ashi.

Journalist atema concessions ya Babina Multi-Speciality Hospital aser Babina Diagnostic Centre nung angutsü.

"Babina group ajanga healthcare, hospitality aser education nung mapa balala inyaker aser nisung 1300 jungnüa nem mapa agüja lir. Manipur nung tang tensa tamajung ajurua aliba ajanga shishilembaba aser taküm libaliro nung tetsükdaksü ajurua lir saka onoki tayongzükbatem liaka services agüja arur" ta Dr Thangjam-isa metetdaksü.

Yaküm Babina Multi-Speciality Hospital lapokba sülen kidney transplants, open heart surgeries aser congenital heart disease atema device closures inyakogo. Iba mozü kidang anogoshia shiranger 100 dialysis agia arudar ta paisa ashi.

Assam kübok Dhubri nung taila doctor ka apu**Guwahati, January 10, 2026**

(Agencies): Dhubri nung medical degree mesüra registration tejangja maliser doctor inyaka aruba nisung ka puogo.

Iba nisung yagi ozüng alema shirangertem yaria arur

asir nisung takümtem lendongbang nung yutsür ta osang tejangja angazükba sülen police-i apu.

"Iba nisung yagi degree mesüra registration melii nisung takümtem lendongi aitsüsa inyaka aru. Kuli tejangja

malirtemi doctor ama inyakba atema police-i tebilemtsü abener" ta Dhubri Police-i metetdaksü.

Iba nisung yagi mapang kobika inyaka aru, shiranger kwi anepalu aser network kar lir asü ta police-i bushisüngdang südar.

Sairang Railway Station nung ILP 22,000 tema agütsüogo**Aizawl, January 10, 2026**

(Agencies): September 2025 nung Bairabi-Sairang railway line lapokba sülen Inner Line Permits (ILPs) 22,000 tema agütsüogo ta police ketdangsürtemi ashi.

Mizoram nung Sairang railway station nung aliba ILP counter ajanga permits 20,914 agütsüogo. September 13, 2025 nungi yaküm küm tatem tashi tourists, traders, aser migrant workers nem item permit agütsü ta police ketdangsür kati ashi.

Maneni, January 1 aser 8 tsüngda permits 1,517 agütsüogo aser itemji züngsema ILP 22,431 tashi agütsüogo.

"Station-i train aruba shia nisung 100-200 nem ILPs agütsür aser anogoshia train ana arur. October aser November nung arur teimbaka tourists liasü aser December ita migrant workers aser traders teimba aru" ta ketdangsürisa ashi.

Mapang mapang ILP maparen majangi arurtem puteta arur aser meshimetsürtem parnok yimtsüngtemi meyipa yokogo ta paisa ashi.

Sairang ILP counter nung nübo meperir kechiyong ketdangsür 20 lemzüka yutsüba ajanga ILP verification den law

and order aser Government Railway Police (GRP) maparen inyaker. Ketdangsürtemi aiben train menuba ajanga anepdang 2:00 ako tashi inyaker aser anepdang 7:00 nungi mapa tenzüker ta police ketdangsürisa metetdaksü.

September 13, 2025 nü Prime Minister Narendra Modi-i 51.38 km talang Bairabi-Sairang railway line lapokja liasü. Iba ajanga Mizoram-i Delhi den sendaktepba mezüngbuba Rajdhani Express tenzüker aser iba dak alia Aizawl nungi Kolkata o Guwahati tashi train tem lapoka liasü.

Syria army-i Aleppo nung SDF sepaitem tali makdar



Syria army aser Kurdish sepaitem anogo ishika kanga mejungi raratepba sülen sorkari Aleppo yimti kübok Sheikh Maqsoud tesem ya military zone ka ta sangdongba sülen nüburtem iba tesem toktür jenshiogo.

Damascus, Aenjeti/January 10 (Agencies): Kurdish-i aniba Syrian Democratic Forces (SDF) sepaitemi ceasefire ka kübok yimti nungi atsüngintsü memulungba sülen Syria army aser SDF ya Aleppo nung kanga sashia raratepdar. Tensa kanga mejungi akümba mapang civilian tem timba pei ki toktür jeshia odar.

Aleppo indang emergency chief Mohammed al-Rajab-i Al Jazeera Arabic dang ashiba agi, nisung 162,000 yimti kübok Ashrafieh aser Sheikh Maqsoud kiyong nungi jenaogo.

Syria military source kati Al Jazeera Arabic dang ashiba agi, Sheikh Maqsoud kiyong nung army tejakdangi odar aser iba tesem shilem 55 bo parnoki aziökogo.

Kasa mapang nung Syria

indang state meyong SANA news agency-i ashiba agi, military-i Sheikh Maqsoud tesem meita aoba mapang SDF züngsem aika puogo. Kurdish fighters tem dang iba tesem toktür aotsü tetuyuba agütsüba mapang tembangba sülen SDF züngsemtem ya pua liasü.

Centre sorkar aser SDF na mangatetep adoka anogo asem tashi raraba sülen Syria indang Ministry of Defence-i Hokolbarnü ceasefire ka benokba sangdonga liasü.

Taoba küm Bashar al-Assad atsüngtokba sülen tang mezüngbuba linük nung kanga sashia raratepdar aser Damascus-i Kurdish fighter tem dang parnok indang semi-autonomous region-i meyipa aotsü asoshi ghonda trok mapang agüja liasü.

Ajisüaka Kurdish councils, shirnoki yimti kübok Sheikh Maqsoud aser Ashrafieh district yimsü asür parnoki bendanga agütsütsü memulung aser 2011 küm nungi parnoki yimsüsüa aliba tesem atema maneni nokdaksü nangzüka liasü.

Iba sülen Syria indang army-i, parnoki Sheikh Maqsoud tesem taliba amaktsü ta shia nüburtem dang humanitarian corridor ka ajanga iba tesem toktür aotsü mepeshia liasü.

Raratep tali küma aoba mapang SDF-i X ajanga video kar lemsatep, kong artillery aser drone agi Sheikh Maqsoud nung Khaled Fajr Hospital amakba sayuogo. Iba mozüki amakba atema parnoki Damascus sorkar den sendaktepa aliba teloktem aitsü aser ashiba agi iba ya rara nung aibelen ka lir.

Pakistan Navy-i surface-to-air missile tendang

Islamabad, Aenjeti/January 10 (Agencies): Pakistan Navy-i Honibarnü North Arabian Sea nung exercise ka agiba mapang surface-to-air missile ka takok ngua tendangogo, ta official sangdong ka ajanga metetdaksü.

Vertical Launching System nungi LY-80 (N) Surface to Air Missile (SAM) kanga takok ngua khaketa yokogo aser iba ajanga raratsü asoshi renema aliba sayur, ta army-i ashi.

"LY-80 (N) SAM takok ngua khatepa yoka anüng nung target ka dak kanga junga khashiogo aser iba ajanga Pakistan Navy indang air defence capabilities tajung sayur," ta kasa sangdong ajanga metetdaksü.

Exercise mapang Loitering Munition (LM) amshia surface target tem dak kashiogo aser iba ajanga precision strike capabilities sayur, ta army-isa shisem.

Kasa mapang nung Unmanned Surface Vessel (USV) tema tzüym nung kanga takok ngua tendangogo aser iba ajanga autonomous naval technology nung alizüng tasen ka tongtetba sayur.

"Capability sayaba nung extreme manoeuvrability, precision navigation aser weather resilience densema lir," ta army-i ashi.

Commander Pakistan Fleet-i iba exercise ya repranga liasü aser Chief of the Naval Staff Admiral Naveed Ashraf-i, Pakistan Navy officer aser sepaitem professionalism aser operation balala atema renema aliba atema tenüngsang agüja liasü.

Paisa, tia tensa ajak nung Pakistan tzüym aser linük maritime tejangrabatem kümzüka ayutsü atema Navy bendanga agüja aliba nenshia metetdaksü.



Philippines kübok Cebu yimti nung landfill tesem ka nung anentsü aluba sülen sabanga alirtem kümzüksü atema tekümzükertem aritepa inyakdar. Iba lendong nung nisung pezü asübabo jangjaogo aser nisung 12 mozükidangi anirogo.

Iran army-i linük tejangraba kümzüka ayutsü nangzük

Tehran, Aenjeti/January 10 (Agencies): Iran army-i ashiba agi, parnoki tongtiban infrastructure aser nüburtem meyong ki-o-jen balala kümzüka ayutsü ta ashiba den, Iran nungertem dang tsükcirtem tasa nung metsüksü mepeshia metetdaksüogo.

United States tir Donald Trump, sorkar anema longkak aitba dak sendakba nung Iran nunger lenirtem nem tekümdangtsü tasen ka agütsüba sülen army-i iba olen lemsatepa liasü.

Military-i Honibarnü sangdong ka ajanga, linük security raksatsütsü merangba atema Israel aser kiralongrar teloktem dak tai tongloksüogo. Kasa mapang nung Tehran-i kümtem tsüngda longkak aitba sentong tulutiba ya aziöktsü atema jenjang tali agidar. Iba lendong nung nisung aika taküm samaogo. Nüburtem libalirotsü atema jenjang kanga saka akümba anema Iran nung tang longkak aita arudar.

"Supreme Commander-in-Chief tetuyuba nung Army-i tanga armed force tem den

longjemmer linük tejangraba, infrastructure tongtiban aser nüburtem meyong ki-o-jentem kümzüka ayutsü," ta military-i ashi.

Iran indang elite Islamic Revolutionary Guard Corps (IRGC)-ia Honibarnü sangdong ka ajanga 1979 küm revolution nung ajanzükbatem aser linük security kechi südir süaka kümzüka ayutsü atema inyaktsü, ta ashiba state TV-i metetdaksü. IRGC ya army den külemi masü saka parnok kija inyaksangshir.

Longkak aitertem aziöktsü atema Iran nunger ketdangsürtemi internet shibangtsü aliba mapang Honibarnü US Secretary of State Marco Rubio-i maneni Washington-i Iran nungertem pusemba nenshia metetdaksüogo.

"United States-i tasü tait Iran nungertem pusemer," ta Rubio-i X nung post sütsü.

Trump-i Iran nunger lenirtem dang, "nenoki injang akha tenzükra onokia akha tenzüksü," ta shia amokmerenba sülen Rubio-i iba

olen lemsatepa liasü.

Trump-i ashiba agi, Iran nunger lenirtem timtem tulu nung lir ama reprangteter aser yimjung nung longkak aitertem tepsetra military-i parnok amaktsü ta amokmerener aliba lephsia metetdaksü. "Hopta ishika tejakdang shingaia akoktsü ta bilema maliasü saka longkak aitertemi yimti karbo atsünger ama reprangteter," ta pai ashi.

Iran nung January 3 nü nungi nüburtemi longkak aita arudar. Libalirotsü atema osetsüt nung jenjang tali akümba anema aser clerical inyakyim tembangdaksütsü khang nüburtemi longkak ait tenzüka liasü. 1979 Islamic revolution sülen Iran nung clerical inyakyim ka benoker yimsüsüa arudar. 1979 küm pro-Western shah yimsüsürtem atsüngtoka liasü.

Honibarnü aonung nüburtemi maneni longkak aitogo aser Tehran anüolen Karaj tesem nung municipal ki ka rongtoktsüba atema state media-i longkak aitertem dak tai tongloksüogo, ta Reuters news

agency-i metetdaksü.

Shiraz, Qom aser Hamedan yimti nung longkak aitba mapang tepsetba security forces tem den asüpila sentong agiba indang Press TV broadcast footage ajanga sayuogo, ta Reuters-i ashi. Iran adena or Persia oshi nung sayuba television channel tem nung Mashhad aser Tabriz yimti nung nüburtem aikati longkak ait tenzüka sayuogo.

Longkak aitba dak sendakba nung mezüngbuba o jembiba mapang Iran lenir Ayatollah Ali Khamenei-i Hokolbarnü, longkak aitertem ya tangar ki-o-jen raksatsürtem aser sentong raksatsürtem ta ashi.

Press TV nung sayuba video ka nung Khamenei-i ashiba agi, Trump teka nung Iran nunger meyirejang ka dak tema azü melanga lir. Pai US-i teyari agüja Israel-i June ita Iran amakba indang jembirba liasü.

Khamenei-isa, iba US nunger lenir ya 1979 revolution tashi Iran yimsü asüba imperial dynasty ama atsüngtoktsü ta takzütsüogo.

Iran Foreign Minister Abbas

Araghchi-i Hokolbarnü Lebanon semdangba mapang linük ken o nung jushiba atema US aser Israel aitsüogo. Pai ashiba agi, linük ana yagi yimjung nung longkak aitertem azütokshia longkak aitsü atema ajungmesor, koba US State Department otongdar kati aitsüogo.

Al Jazeera osangbener Tohid Asadi-i Tehran nungi ashiba agi, longkak aitertem linük yimtiba Tehran aser tanga yimtitem nung taliba küma odar.

Paisa, ketdangsürtemi tensa ya tasa balala amshia aziöktsü merangdar, kong security akangshiba den lisopurtem atema subsidy scheme tasen ka benokba densema lir.

2022-2023 küm Mahsa Amini police ket nung asüba atema longkak aitba sülen tang Iran nung nüburtemi tesashitiba longkak aitar.

Rights group Amnesty International-i ashiba agi, meimchi temeden aser international temzüng ozüng alema inyaksangshibatem mimbanga ayutsü atema internet shibangtsüogo.

WC asayatsü masayatsü mejangjaba ajanga onok dak kongshir: Shanto



Najmul Hossain Shanto

Aenjeti/January 10, 2026 (Agencies): Bangladesh Test captain Najmul Hossain Shanto-i, pai aniba team taruba ita India nung T20 World Cup asayatsü masayatsü mejangjaba ka kecha masü ama dang sayuaka iba ajanga asayartem dak kongshiogo, ta ashi.

Taoba mapang team captain Tamim Iqbal dang Bangladesh Cricket Board (BCB) director M Najmul Islam-i "Indian agent" ka ta ajaba atema Shanto-i pa aitsüogo. Tamim-i süngjemshitsü aser tang mangatettep aliba tajungyimi bentettsü atema ayongzükba atema pa aija liasü.

India nung security tsütsü tetsükdaktsü adoktsü akok ta shia BCB-i Bangladesh team tanga tesem ka nung asayatsü atema ICC dang mepeshiba sülen Bangladesh team World Cup campaign ya tang mepetmesü tulu nung lir.

"Mezüngbuba nung team

World Cup result reprangdangra onoki junga dang asaya aruogo. Taoba küma onoki kanga junga asayaogo, saka iba dang nungi maongka tajungba liasü, koba onoki magitet.

"Saka World Cup asayatsü lia teti langka mesüra langkabo ataloker. Taoba World Cups asem nung kü tajangshiba dak ajemdaker jembirba- iba yagi onok dak kongshir," ta Shanto-i Hokolbarnü osangbenertem dang ashi.

"Tangbo onoki onok ya professional cricketer asaya aser kecha masü ama dang sayur. Nenokia onok jilushir dang ta angateter alitsü- ya temela masü," ta pai shisem.

Shanto-i ashiba agi, asayartemi takok tashi iba minprong nokdangtsü meranga asaya dak rangloker inyakdar.

"Iba ya matalok asü nung tajungba süla, saka iba ya onoki mazüoktetsü," ta pai ashi.

T20 World Cup ya February

7 nü tenzüksü aser Bangladesh team Kolkata nung asaya asem aser Mumbai nung asaya ka asayatsü lir.

BCCI tetuyuba nung pacer Mustafizur Rahman IPL nung masayadaktsütsü asoshi telemtetba agiba sülen BCB-i Bangladesh team asaya Sri Lanka-i belener aotsü takhangba agütsüogo.

"Iba ya kodaser atalok iba indang osang tejangja ni memetet mesüra iba ya koda azüoktsü ajia mejangja. Ajisüaka iba amala tensa ka nung acting aitsü ya kanga tasak lir," ta Shanto-i ashi.

"Tebilemdang shitak nung World Cup-i oa kong asayadir asayaka onoki team atema tajungtiba dang asayatsü asoshi rangloker inyaktsüla," ta pai ashi.

Shanto-isa, BCB director M Najmul Islam-i Tamim Iqbal anema jembiba atema tezü adangba lemsatepogo.

Malaysian Open: PV Sindhu semifinal nung tsükogo

Aenjeti/January 10, 2026 (Agencies): India tsürtem rongnung badminton asaya nung temaba jenjang nung alila Indian shuttler PV Sindhu Malaysian Open nung Honibarnü semifinal nung China tsür Wang Zhiyi-i tsükdaktsüogo.

Arishi küm 30 tain Sindhu ya semifinal nung Zhiyi-i straight set nung dang koka liasü. Iba asaya ya China tsür la yagi 21-16, 21-15 agi koka liasü.

Sindhu, shiba mapang talangka lir asayamung ka nung semifinal tonga asaya liasü, lai iba asayamung nung kanga junga asayar ama bilema liasü, saka lai China tsür la den ya toktepa masayatet, shibai asaya amokbanger asaya liasü.

Sindhu-i iba asayamung mezüngbuba asaya nung Sung Shuo-yun 21-12, 22-20 agi

straight sets nung akok aser iba sülen Round of 32 nung Japan tsür Tamoka Miyazaki 21-8, 21-13 agi ayong ayonga koka liasü.

Hyderabad nungi nüntugu asayar yagi quarterfinal nung Akane Yamaguchi koka liasü. Japan tsür la ya yiruba ajanga masayatetsüsa aküm.

Kümtem tsüngda Sindhu-i junga masayateti arudar aser lai mapang talangka asayamung ka danga koka mali. La yiruba ajanga tetsükdaktsü adokba den form nung maliba ajanga aiben tamakok angur aser taoba küma la season metemjungu asaya nungi anena liasü.

Sindhu-i Olympics nung medal ana tashi ngua lir, saka la wangshiba mapang tembanger ama reprangteter, ajisüaka taküm kümbo lai kanga junga asaya tenzükogo.

Neeraj Chopra aser coach Jan Zelezny na pilaogo



Coach Jan Zelezny & Neeraj Chopra

Aenjeti/January 10, 2026 (Agencies): India nunger nüntugu javelin throw asayar Neeraj Chopra-i, season ka dang külemi inyakba sülen pa aser Czech nunger coach Jan Zelezny na pilaba sangdongogo.

Pai tena pila kuli tejangja magütsü, saka Zelezny tawabangba kübok pai taoba küm nület meter 90 tonga tsütetba densema tongtibang alizüngtem tongtetba indang jembia liasü.

Chopra-isa, pai lanuwa nungi nükshiba asayar ka den inyaktsü maongka anguba ya nükjidong atalokba ka liasü, ta ashi. Pai exercise tasen, technical idea aser tebilemdangba tasen aika angazükogo.

"Jan den inyakba ajanga idea tasen aika asoshi kü tenük lapoktsüogo," ta Chopra-i ashi.

"Technique, rhythm, aser arakzüba yimya indang pai bilemba ya jangrademtsüka aser ni session shia pa dang nungi aika angazükogo," ta Olympic nung anaben tashi

medal ngur aliba asayar yagi ashi.

"Ajisüaka kü atema ajak dang tajungtibaji küna tsüngda tembar tesendaktep ya lir, shiba kü taküm tepeyong kü nükrangdong liasü. Jan ya javelin thrower ajak rongnung tajungtiba dang masü saka ni ajuruba nisungtem rongnung tajungtiba ka lir," ta pai shisem.

"Ni 2026 küm atema yongya atar. Ni November ita tetenzüklen nungi renem tenzükogo. Teti ama kü nükjidonggi anema alitsü asoshi lir aser yakta tokteptsü asoshi yongaya atar," ta Chopra-i ashi. "Kasa mapang nung ni ano 2027 küm World Championships aser 2028 küm Olympic Games atema-a yongya atar," ta pai shisem.

"Neeraj amala asayar ka den inyakba ya tajangshiba tajung ka liasü. Küna ajurutepta aser külemi inyakba atema aser ni teyari agüja pai nület meter 90 tonga tsütetba atema pelar," ta arishi küm 59 tain Zelezny-i ashi.

Saka-i tenangzüktepba tasen yanglutsü mulunga agizükogo



Bukayo Saka

Aenjeti/January 10, 2026 (Agencies): Arsenal nungi asayar Bukayo Saka-i club nungi talangka asayatsü atema tenangzüktepba yanglutsü mulunga agizükogo.

Arishi küm 24 tain asayar den tenangzüktepba tasen yangluba sülen pa ya club nung sen timtiba aazükba asayar akümtsü ta angateter.

Premier league title arishiba squad meraksadaktsütsü merangba mapang Arsenal-i tongtibang asayartem den mapang talanglang asoshi

tenangzüktepba yangluba tatishitsü rongnung Saka den tenangzüktepba yangluba ya ka lir.

William Saliba, Gabriel Magalhaes, Ethan Nwaneri aser Myles Lewis-Skelly nunger ajaki taoba küm tenangzüktepba tasen yanglushio.

England nunger international asayar Saka ya 2018 küm mezüngbuba club nungi asayaba sülen Gunners pur atema tongtibang asayar ka kümogo. Pa ya club indang

Hale End academy nungi anitetba asayar ka lir.

Taoba season pa hamstring yiruba ajanga ita asem tashi masayatetaka Saka-i asaya 37 nungi goal 12 idaktsü aser assist 13 süja liasü. Pa 2024 küm December ita surgery agia liasü.

Saka ya Arsenal asoshi teti dang junga asayaba asayar ka kümogo. 2023-24 season nung pa mezüngbuba club indang captain aküm aser pai goal 20 idakja club nung goal timtiba idaktsüba asayar liasü.

Tang asaya aliba season nunga pai tang tashi nung asaya 27 nung goal tenet idaktsüogo aser assist trok süja lir

Arsenal pur küm aika PL title abentsü meranga asayar arur tang asaya aliba season yabo parnoki akoktsü imlar. Parnok tang Premier League nung tanabuba jenjang nung aliba team dang nungi point trok agi timba lir aser Champions League nunga asaya trokprongla kokogo.

BILEMDANGANG

"Nai chinüba chiyongtsü chia litettsü
asoshi chiyongtsü tapet Chiang."